

仁祖大王實錄卷之五

三月朔乙卯昧爽東方有氣如火光夜南方艷方坤方有氣如火光○檢察使鄭經世還自嶺南啓曰初受朝命即曉諭小民使毋駭散倡起多士以興義旅兩件事而到道內六日即聞王師奏捷諸賊授首急於還朝即為登道而臣竊見道內募兵之事與壬辰不同壬辰則各邑守令棄城逃竄故一時忠義之士奮袂而起數千健兒不日可聚今則大小節鎮各領其衆故士子等不過各率丁奴制挺為伍可見 祖宗遺澤之在人而士子等服習儒賢之教競勸忠義之風亦在可獎其所募糧各從附近輸運于官倉漕運入京以為國用之意令從事官洪鎬留在勾管矣○義禁府啓曰聞賊适入城之日有武臣堂上二人為左右邊巡將推問於巡廳書貲南承龍則曰左邊乃金應昌右邊乃任鎔云請拿來鞫問後鞫廳訊問且與承龍面質則情迹盡露并令梟示○丙辰初昏東方有氣如火光○丁巳 慈殿下教于政院曰以民窮財盡之故兩殿進上皆已減損而自 上誠孝篤至獨於予依舊供進予何心而受之乎一様減損可矣政院啓稟 上荅曰 慈教雖如此不可減損宜以此意回啓 慈殿又以 宗廟祭享尚且減損仍受進上未安之意下教政院更達不得奉行